

Maddi Urteaga Riaño

D maila • 3 aipamena

Kaixo! Nire izena Maddi da, 13 urte ditut eta La Salle ikastetxeko DBH 1. maila ikasten ari naiz. Lotsati samarra naizen arren, irrifar gozoa beti ahoan duen neskatila beasaindarra nauzue.

Nire zaletasunen artean, familian bidaiatzeaz gain, padelen jolastea da. Pilotari jotzen diodan bakoitzean nire kezak uxatzen ditut. Halere, gehien gustatzen zaidana nire lagunekin egotea da, momentu ahaztu ezinak elkarrekin pasatzen ditugunak!

Aipamen hau irabazteak izugarritzko poza eman dit eta nire familiari eskaintzen diot.


Ea zuen gustukoa den!

“AMONA NAIZ”

Egun arraroak ez ditut gogoko eta azken aste hauek oso-oso arraroak suertatzen ari dira. Gurasoak ezkututzen saiatzen badira ere, amaren begirada tristean erreparatzea besterik ez dago jakiteko gauzak gure familian oker daudela. Bostok afaltzeko garaian mahaiaren inguruan esertzen garenean, eguna nola joan zaigun elkarri kontatu baino edozein huskeriaz aritzea nahiago dugu eta, askotan, postrerik hartu gabe, bukatutzat ematen dugu otordua.

Iñaki, Nora eta hiruok amona Karmentxu bisitatzera joan gara. Bere gazte denborako xarma eta edertasuna mantentzen dituela agerian da, baina gaurkoan bere begi urdin eta txikiek dir-dir berezia egiten zuten. Ile-apaindegira joanda, marra gorridun jertsea eta galtza beltzak soinean jantzita, oso dotore agertu zaigu. Iñakik txistu egin dio “fiiuuuuuu” eta gu, egia esan, hitzik gabe utzi gaitu. Amona oso pozik ikusi dugu eta horregatik harritu digu etxera bazkaltzera etortzeko esan eta buruko minez txikitzen zegoela erantzun digunean.

Amona Karmentxurekin hartu dugun sorpresa gurasoei komentatu diegunean amak ezin izan du ezkutatu bere haserrea eta aitari begiratu eta zerbait gustatzen ez zaionean bezalaxe, ezkerreko bekaina altxatu du. Etxeko giro arraroak amonarekin zerikusia duela garbi geratu zaigu, baina zer izango ote da? Zer du amona Karmentxuk amari gustatzen ez zaiona? Aita eta ama sukaldean zeundela hitz egiten entzun ditut biak eta entzun dudanak tristetu nau. Ama eta amonaren arteko harremana zapuztuta dago, euren artean izandako konplizitatea galdu da, akabo! Ama oso haserre dago, pixkanaka ahotsa altxatuz doa eta horrelako batean hiruroi etortzeko oihu egin digu.



Sukaldean sartzen lehena neu izan naiz. Aitaren ondora joan eta aitak keinu batez bere magalean esertzeko esan dit. Iñaki eta Nora etortzen ez zirenez, amak, ilea motots batean biltzen zuen bitartean, berriro ere etortzeko dei egin die eta oraingoan lehen solairutik entzuteko moduan egin die. Iñaki, betiko moduan, entzungailuak belarrietan jarrita jaitsi da eta Nora, nola ez, mugikorra esku artean duela, ziurrenik selfie saio bat egin ondoren. Deseroso amak egindako garrasiarekin, sukaldean sartu da. Bai bata eta bai bestea, amonarena beraiekin joango ez balitz bezala! Ni, ordea, lapurretan ari dena baino urduriago, azkazalak jateari ezin eutsiz. Ama hizketan hasi da eta, ahots baxuz, amona, azken boladan, etxera gutxitan etorri dela esan digu. Hori berria ez da! Benidorm-eko bidaiatik bueltan gauzak zeharo aldatu direla azaldu digu eta amonak beste plan eta zeregin batzuk dituela aipatu digunean, amari begiak malkoz bete zaizkio. Aitak "lasai, laztana" esan dioenean, negar malkotan, amona, gure amona Karmentxu, gizonezko batekin dabilela, zotinka esan digu. Hortxe geratu gara bata besteari begira, baina Iñakik horrelaxe bota du:

- Kontxo! Amona maitemindu zaigu!

Amona maitemindu da, amona maitemindu da, amona maitemindu da, amona maitemindu da... Baina maitemintzea, amestea bezala, txarra al da ba? Ama eta amonaren arteko haserrearen arrazoa amona maiteminduta dagoela bada, lasaitzen nau, ez dakit zergatik kezkatzen den ama.

Amak oso harro kontatu izan digu amonak, gaztetandik, beste amonak ez bezala, etxetik kanpo egin duela lan, lanpostu garrantzitsu bat izatea lortu zuela gizonezkoak nagusi ziren enpresa handi batean. Urtebetez Frantziako eskola batean ikasten aritu zela, kotxea gidatzeko baimena atera zuela, tarteka zigarroak erretzen zituela eta, jai egunetan, Cointreau-a izotzarekin hartzen zuela hamaika aldiz errepikatu digu. Amona Karmentxu baino modernoagorik ez dela egon pentsatuz hazi gara. Gainera, aitona Joxi zenarekin ezkontzeko oztopoak ausardiaz gaingitu zituen, txutxu-mutxuei kasu ez eginez. Bien arteko maitasuna eredugarria izan da amarentzat, baita guretzat ere, nahiz eta aitona Joxi ez dudan ezagutu, ni jaio baino lehen hil baitzen. Aitonaren azken urteak oso gogorrak izan ziren eta amona beti bere ondoan izan zuen, gau eta egun. Zenbat eta zein ederki zaindu zuen badakigu. Hauek denak amak ezin ditu ahaztuta eduki. Amona pozik ikusi nahi dut, gaur ikusi dugun moduan eta amari horixe esango diot.

Sukaldean jarraitzen dugu isil-isilik ateko txirrinak jo duen arte eta espero ez nuen "Amona naiz" entzuteak pozez bete nau. Pozez bete gaitu.